

02 夢想的所在

邱素真

學校的運動埕邊仔，有一塊菜園仔，內底有幾若逝菜股，號做「歡喜農場」。歇熱了後，草仔發甲滿四界。這幾冬，電視新聞定定咧放送食安風暴，老師想欲予阮有食安的觀念，看阮嘛興興仔，能力嘛有夠，就決定欲恁恁阮同齊種作。

上課的時陣，老師先介紹「友善耕作」，愛阮種健康的農作物俗愛護環境，閣講食在地的食物嘛會當節能減碳。予阮有正確的觀念了後，才閣佻阮討論想欲種的物件。高麗菜、芥菜、蔥仔、蒜仔、番麥、臭柿仔、草莓、樣仔，夢想真濟，只可惜菜園仔無夠大。

繼落來開始薙草，開白花的刺查某上大穰、上影目，一下仔就予阮薙了了。臭頭香連根挽起來，「Ua~！敢若細細粒的番薯喔！」逐家大聲咻；鹽酸仔草開粉紅色的花蕊，細細蕊真古錐，根挖起來了後敢若細粒的白菜頭。蚪蚪的蜈蚣雄雄伸直、密甯甯的狗蟻滿四界走、胸坎仔頂有一丸白白的蜘蛛跳咧跳咧、軟軟的刺毛蟲四界趁。菜園仔內的蟲豸真濟，頭一改遮爾仔近咧看，予阮大開眼界。

閣再來是掘塗培菜股，阮相爭擗鋤頭欲掘，一下掘落去，看著杜蚓仔咧滾絞，一尾變做兩槓，真正對不起伊，

好佳哉杜蚓仔有再生能力，一尾會變兩尾。雖罔是透早來，毋過逐家猶原大粒汗細粒汗，無閒tshih-tshih。

總算會使佇菜股種物件矣，閣來共校園收集來的落葉炭起來，工課就完成囉！沃水、薙草、落肥猶原是日常的工課。有閒的時去菜園仔撻撻咧，看著農作物青 ling-ling 擔頭向望，一工大過一工，心情真爽快，果然是名不虛傳的「歡喜農場」。我想這嘛是真濟人為著理想堅持落去的動力！

十二月尾，老師恁恁阮參加料理比賽。平常時仔共教室當做灶跤咧練習，阮定定佇第四節課練習煮食，按呢中晝就通好加菜囉！比賽這工，阮對簡單的料理——蔥仔卵、炒高麗菜開始落鼎。阮嘛真長志，竟然得著頭名，歡喜甲飛上天！

「歡喜農場」是性命生澁的所在，嘛會當實現心內的夢想，向望逐家的心肝底攏有這個所在。